



Broj:01,02,03,04/8-05-2-1134/25
Sarajevo: 17. 7. 2025.

IZVJEŠTAJ
S 18. PLENARNE SJEDNICE PARLAMENTARNE SKUPŠTINE UNIJE ZA
MEDITERAN i 9. SAMITA PREDSJEDNIKA PARLAMENTARNE ZEMALJA
ČLANICA UNIJE ZA MEDITERAN
Malaga (Kraljevina Španija), od 25. do 27. juna 2025.

Zamjenica predsjedavajućeg Delegacije PSBiH u Parlamentarnoj skupštini Unije za Mediteran (PSUzM) Rejhana Dervišević učestvovala je na 18. plenarnom zasjedanju Parlamentarne skupštine Unije za Mediteran koje je održano u Malagi (Kraljevina Španija) od 25. do 27. juna 2025. Zasjedanju su prisustvovala Jelena Rajaković, šefica Odjela za bilateralne odnose, i Nataša Čabak, prevoditeljica.

Na plenarnoj sjednici, na kojoj su učestvovali poslanici iz više od 40 država članica te multilateralne parlamentarne organizacije koja okuplja zemlje Evropske unije, Bliskog istoka i sjeverne Afrike, te Kneževinu Monako i tri balkanske i mediteranske zemlje – Bosnu i Hercegovinu, Albaniju i Crnu Goru, razgovaralo se o migracijskoj situaciji u Mediteranu.

Učesnicima plenarnog zasjedanja obratila se zamjenica predsjedavajućeg Delegacije PSBiH u PSUzM-u Rejhana Dervišević.

Govoreći o pitanju i izazovima migracija u mediteranskom regionu, poslanica Dervišević je ocijenila da, pružanjem utočišta onima koji bježe od sukoba, progona ili prirodnih katastrofa, društva pokazuju predanost ljudskim pravima i globalnoj solidarnosti.

„Kada se migracijama efikasno upravlja, one nisu samo pokretač ekonomskog, društvenog i kulturnog prosperiteta već i dokaz otvorenosti, inkluzije i zajedničkog ljudskog napretka“, poručila je Dervišević.

Prema njenim riječima, moralna obaveza svih država u mediteranskom regionu, suočenih sa izazovom priliva migranata, jeste da grade mir, traže politička rješenja umjesto sukoba, podstiču dijalog između drugih i drugačijih i obezbjeđuju kvalitetno obrazovanje. Bez takvog pristupa ne mogu se stvoriti legalna, pravedna društva koja prihvataju različitost i štite

ljudska prava, poručila je Dervišević u svom obraćanju na plenarnom zasjedanju PSUzM-a u Malagi.

Učesnici plenarnog zasjedanja PSUzM-a, osim o pitanju migracija, raspravljali su i o klimatskim promjenama, zapošljavanju mladih, jačanju rodne ravnopravnosti i drugim izazovima s kojima se suočava Mediteranski region.

U okviru zasjedanja poslanica Dervišević učestvovala je u radu Komiteta za ekonomska i finansijska pitanja, socijalna pitanja i obrazovanje PSUzM-a i tom prilikom održala i bilateralni sastanak s predsjedavajućim tog komiteta i poslanikom Velike narodne skupštine Turske Samilom Ayrimom. Na sastanku se razgovaralo o problemu migracija u cijelom svijetu i milionima ljudi koji su, iz različitih razloga, prinuđeni da napuste svoje domove. Poslanica Dervišević kazala je da su za integraciju migranata nužni odgovarajući zakonski propisi o migracijskim politikama, ne samo na nacionalnom nego i na lokalnom nivou, koje bi promovirale socijalnu inkluziju i prepoznale značaj brze i uspješne integracije migranata u društvo. Prema riječima poslanice Dervišević, u savremenom svijetu prioritet se, nažalost, daje naoružavanju, umjesto osiguravanju mira, stabilnosti i bezbjednosti. Turski kolega informirao je poslanicu Dervišević da Turska trenutno ima više od četiri miliona izbjeglica, kao i da je ta zemlja učinila mnogo u njihovom zbrinjavanju, podršci i inkluziji.

Uporedo sa zasjedanjem PSUzM-a održan je 9. samit predsjednika parlamenata zemalja članica Unije za Mediteran, na kojem je učestvovao zamjenik predsjedavajućeg Predstavničkog doma PSBiH Marinko Čavara. Samitu su prisustvovali i Marija Čosić, šefica Kabineta Marinka Čavare, i Azra Kost, rukovoditeljica Sektora za međunarodne odnose i protokol.

U obraćanju tokom Samita zamjenik predsjedavajućeg Predstavničkog doma Marinko Čavara istakao je značaj međusobnog uvažavanja, dijaloga i konstruktivne saradnje među državama regiona, s ciljem jačanja stabilnosti i bezbjednosti cijelog mediteranskog prostora. Posebno je naglasio potrebu neumornog traženja rješenja svih sporova kako bi se izbjegli sukobi, te uspostavili međunarodni mehanizmi koji će obavezivati sve države – bez obzira na njihovu moć – na poštivanje suvereniteta država i naroda, kao i na zaštitu slobode i osnovnih ljudskih prava svakog pojedinca.

Samit, kojim su kopredsjedavali predsjednica Kongresa poslanika Kraljevine Španije Francina Armengol i prvi potpredsjednik Senata Javier Maroto, okupio je predsjednike, potpredsjednike i delegate parlamenata zemalja članica Unije za Mediteran, kao i predstavnike Evropskog parlamenta.

Centralna tema Samita bila je migracijska situacija u mediteranskoj regiji, sagledana iz sveobuhvatne perspektive. Učesnici su razmijenili mišljenja o ključnim izazovima s kojima se region suočava. U okviru brojnih radnih grupa i foruma, uključujući i Forum o budućnosti Mediterana, usvojena je zajednička politička izjava kojom je potvrđena kolektivna predanost miru, stabilnosti i održivom razvoju regiona.

U završnoj deklaraciji istaknuta je potreba za intenziviranjem saradnje među mediteranskim državama, uspostavom sigurnih i uređenih migracijskih politika, unapređenjem i zaštitom ljudskih prava, provođenjem energetske tranzicije, te pružanjem podrške mirovnim i stabilizacijskim procesima na Bliskom istoku, u sjevernoj Africi, kao i u svim kriznim područjima širom svijeta. Potvrđena je i predanost parlamentarnoj diplomatiji kao ključnom instrumentu za izgradnju povjerenja i međuinstitucionalne saradnje.

Samit je bio i prilika za niz bilateralnih susreta i razgovora s predsjednicima i potpredsjednicima parlamenata zemalja članica Unije za Mediteran.

Završetkom 18. plenarnog zasjedanja i 9. samita završeno je predsjedavanje Kraljevine Maroko Parlamentarnom skupštinom Unije za Mediteran, a predsjedavanje tom organizacijom preuzela je Arapska Republika Egipat.

SEKRETAR DELEGACIJE

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Delegaciji PSBiH u PSUzM-u
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- Kopija: Ministarstvo vanjskih poslova BiH